

ILUARSIISSUT**12. oktober tunniunneqarsimasoq taarserpaa
(Immikkoortumi kingullermi oqaaseqatigiit allanngortinneqarput)**

Ukioq 2013 pinngitsaaliinernut akiuiniarfittut ukiunngortinneqarnissaa pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Astrid Fleischer Rex, Demokraatit)

Akissuteqaat

(Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoq)

Siullermeerneqarnera

Astrid Fleischer Rex-mut qujanaq, ajornartorsiut ilungersunartoq oqaluuserisassanngortissimmagu.

Erseqqissassavara Naalakkersuisut pinngitsaaliisarneq pinerlunnertut innarliinertullu isigimmassuk maani inuiaqatigiinni akuerisinnaanngisarput.

Astrid Fleischer Rex isumaqatigaara tassani unammilligassaqaratta. Piviusuummammi arnat amerlavallaartut pinngitsaaliinermik nalaataqartarlutik. Eqqorpormi Astrid Fleischer Rex allamat ajornartorsiut annikilliarternaviannngitsoq. Tassami misissuinerit ilimanarpoq paarlattuanik ingerlasoqartoq. Tamannalu annilaarnarpoq.

Arnat pinngitsaaliineqarsimasut amerlaqisut, pisuusut, kanngusullutik imminnullu pisuutillutik misigissutiminnut akiuupput, amerlaqisullumi – pingaartumik arnat inuusuttut – isumaqartarput kisimiillutik taamatut misigisimasarlutik. Pingaaruteqarpoq nalunaarutigissagutsigu tamakku kisimiinngitsut aamma uagut inuiaqatigiittut ikiussallugit piareersimasugut.

Kinguaassiuutitigut pinngitsaaliinerit suugaluartulluunniit inuttut aningaasaqarnermullu tunngatillugu maani inuiaqatigiinni nukissarpassuarnik atuiffiusarput. Ilaatigummi kinguaassiuutitigut pinngitsaaliinerit kingunerisarmassuk pinngitsaalisasut ilinniarnerminnik naammassinninnissaminnik suliffimminnilluunniit paarsinissaminnik ajornartorsiuteqalernerat. Ajornerpaagaangallumi pinngitsaaliinerit kingunerisinnaasarpaat pinngitsaalisasimasut timikkut tarnikkullu innarluutilittut naappaateqalernerat.

Naalakkersuisut nakuusernarnerit suugaluartulluunniit tamaasa siunnerfilimmik akiorneqarnissaat tapersorpaat. Taamaakkaluartoq piviusorsioruorsorinngilarput 2013-imi pinngitsaaliisarnep immikkut ittumik akiorneqarnissaata aallartinneqarnissaa, sulissutigisassammi ukiumit ataatsimit sivisunerusut ineriartortinniarlugit piareersarnermut piffissaq sivisooq atornerqartariaqartarmat. Taamatuttaarlu toqqarlugu aningaasalersuinissaq, tassa paasisitsiniaaneq aningaasanut inatsisissap isumaqatigiinniutigineqarneranut ilanngunneqarsinnaanngorlugu, innersuussutigineqarsimannngilaq.

Naalakkersuisut suliniutit tamaasa paqumigisaqarnermik unitsitsinnaasut taamatullu inuuniarnermut peqqinnissamullu ilaatigut tunngasuni unammilligassat suliarineqartarnissaat tapersersorpaat. Kisiannili nalunnigilarput sukut tamaana paasisitsiniaasarnerit ataavartumik qaqutigunnaq sunniuteqartarmata. Nalunnigilarputtaaq paasisitsiniaanerit taakkuinnaallutik atorsinnaanngimmata. Pisariaqartarpoq qajannaatsunik neqeroorutininik ilaqartinneqartarnissaat taamaalillutik atonerluinermit, annersaasarnermit allaniillu aniguerusuttut ingerlanerminni tapersersorneqarsinnaasarniassammata. Taamaammata Naalakkersuisut annertunerusunik sulissuteqartoqalersinnagu paasiniaasoqartarnissaa sukumiisumillu piareersaasiortoqartarnissaa kissaatigaat.

Upernaakkut ataatsimiinnermi Naalakkersuisut nakuusernarnermut periusissaq iliuusissanullu pilersaarut saqqummiutissavaat, ilisimasanik paasisutissiisarnermillu sulissuteqarnermik kiisalu tapersersuisarnermut katsorsaasarnermullu neqeroorutininik, arlalitsigut kinguaassiuutitigut pinngitsaaliinermik ilaqarsinnaasunik, imaqartussaq.

Naalakkersuisut innarligaasut isumannaatsuunissaat pisinnaatitaaffiilu qitiutikkusuppaat. Taamaammata pilersaarut inatsisiliassatut siunnersuutininik annersagaasartut pinngitsaalisaaqullu illersorneqarnissaannut iluaqutaasinnaasunik imaqassaaq, peqatigitillugu isumaginninnikkut sulissutigisassanut sinaakutissanut annertusaataassalluni. Assersuutigalugu Naalakkersuisut siunnersuutigissavaat politiinit illersugaanermut, najukkameeqqusaannginnermut peersitsisarnermullu Inatsisip Kalaallit Nunaannut atuutilersinneqarnissaa.

Upernaakkut ataatsimiinnermissaaq Naalakkersuisut angutit arnallu akornanni naligiissitsinissaaq pillugu inatsisissaaq nutaaq saqqummiutissavaat peqqusiileqisitsinnginnissamik kinguaassiuutitigullu peqqusiileqisitsinnginnissamik erseqqissumik imaqartussaq. Anguniagaavoq kinguaassiuutitut tunngatillugu peqqusiileqisinneqarnermik eqqugaasut inatsisitigut illersugaanerata annertusisinneqarnissaa, taamatullu erseqqissumik nalunaarutigalugu Kalaallit Nunaanni uagut kinguaassiuutitigut innarliisarnerit suugaluartulluunniit akueriniangikkivut.

Naalakkersuisuni nunannaarutigaarput Saaffik-up qitiusumik sullivittut pilersinneqarneratigut, suliamik ilisimasallit sulissutiginiagaat illumi ataatsimiilermata, meeqqanullu kinguaassiuutitigut atonerlugaasimasanut assigiinngitsunik suliallit misissuisarneri katsorsaasarnerilu qulakkeerneqarlutik. Saaffik taamatuttaaq siunnersuisarfittut ilisimasanillu katersuiffittut atuutissaaq. Anguniagaavoq kinguaassiuutitigut atonerluisarnerit pillugit ilisimasatta annertusarneqarnissaat, taamaalilluta kinguaassiuutitigut atonerluinerit suugaluartulluunniit pitsaanerusunik pinaveersaartissinnaalissagatsigit katsorsaavigalugillu.

Taaneqareersutut Naalakkersuisut sulissutiginiakkat paqumigisanik piaataasut inuiaqatigiinnilu inuuniarnikkut ajornartorsiutinik sulissuteqarnermut tunngasut tapersersorpaat. Astrid Fleischer Rex-ilumi isumaqatigaarput oqarmat kinguaassiuutitigut pinngitsaaliisarneq immikkut sammisariaqaripput.

Taamaakkaluartoq Naalakkersuisut inunnik isumaginninnermut tunngassuteqartuni sulissutigisat ingerlareersut piareersarneqartulluunniit pisariaqartinneqartutut sammineqarnissaat aalajangiusimaannarusuppaat.

Kinguaassiuutitigut pinngitsaaliisarnermut sulissutigineqartut pitsaassusiisa qulakkeerneqarnissaat siunertaralugu Naalakkersuisut matumuuna allannguutissamik siunnersuuteqarput: **“Ukioq 2014 pinngitsaaliisarnermut akiuniarfittut ukiunngortinneqarnissaa pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut”**.